

14. august 2026

UKA 2026/256

Inatsisartut Suleriaasianni § 36 malillugu apeqquaqat aallaavigalugu oqallinnissamik imaattumik siunnersuuteqarpunga:

Isumaginninnermi piginnaasat atorluarneqarnerunerisigut naartusunut, ilaqutariinnullu peqqinnissaqarfimmi siusissumik tapersersuineq qanoq nukittorsarsinnaaneripput pillugu, apeqquaqat aallaavigalugu oqallinnissamik siunnersuut
(Inatsisartunut ilaasortaq Pipaluk Olsen, Demokraatit)

Naartuneq, ernineq, ilaqutariittullu inuunermi piffissaq siulleq piffissaapput aalajangiisuusut. Naartuneq amerlasuunut pilluarfiuvoq, ilaannullu aamma nalorninermik, ernumanermik, misigissutsikkullu ilungersunartorsiornermik nassataqarsinnaasarpoq.

Arnaq naartuleraangat siusinnerusukut misigisaasimasut, nalaassimasamit kingunerlutsitsinerit imaluunniit inuttut unammillernartut puttallaqqajaasarsinnaasarput. Tamanna naartunermut, ataatanngortussamut, meeqqallu piffissaq siulleq inuunerinut sunniuteqarsinnaasarpoq. Tamanna pillugu ikiorserneqarsinnaaneq, siusissumik ikiorserneqarnissaq, ilaqutariinnilu pisoq aallaavigalugu ikiorserneqarnissaq pingaaruteqarpog.

Demokraatit isumaqarput, isumaginninnermi suliatigut piginnaasat peqqinnissaqarfimmeereersut, peqqinnissaqarfimmullu atasuni immikkoortorta qarfinneereersut atorluarnissaannut pitsaanerulertariaqartugut.

Peqqinnissaqarfiup naartusut, ilaqutariillu siusissumik sullittarpaat. Ajornartorsiutit annertunerulersinnagit tapersersorneqarnissamik pisariaqartitsinerit paasinissaannut, tamassuma immikkut periarfissaatittarpaa. Tamatumanili suliatigut isumalluutit eqqortumik atorneqartariaqarput. Ernisussiortut, peqqissaasullu soorunalimi qitiusumik sulii inissisimassapput, kisiannili naartusunik aamma ilaqutariinnik peqqissutsikkut nalinginnaasumik ilitersuinermit annerusumik pisariaqartitsisunik sullissinnermi isumaginninnermi suliatigut piginnaasat pingaarutilimmik ilassutaasinnaapput.

Assersuutigalugu ilaqutariinnik ilitersuinerup, nalaassimasamik kingunerlutsitsinerup, naalungiarsunnik katsorsaanerup, oqaloqateqartarnerullu iluini naleqquttumik ilinniaqqissimasunik, piginnaasaqartunillu ullumikkut sulisoqarpoq. Piginnaasat taakkua aqqissuussaasumik, innuttaasullu qanillugit atorneqarunik annertuumik allannguisinnaapput.

Ilinniaqqinnissamut aningaasaliigutta, piginnaasanillu pingaarutilinnik ineriartortitsigutta kingorna pisariaqartitsinerpaaffimmi atorneqanngikkunik ilumoorsinnaanngilaq. Piginnaasanik taakkuninnga atuinissamut peqqinnissaqarfik periarfissaqartitsinngippat, sulisut suliaqarfinnut allanut



nooratarsinnaapput. Piffissami sulisut pikkorissut piginnarnissaannik pisariaqartitsereernitsinni tamanna naleqqutinngilaq.

Tamanna pillugu naartusut, naalungiarsuit, ilaqutariillu pillugit peqqinnissaqarfik tamat isiginnissuteqarnerusumik qanoq sulisinnaanersoq eqqartortariaqarparput. Siusissumik suliniuteqarnerup nukittorsarnissaanut ileqqorissaartumik, politikkikkullu pisussaaffeqarpugut. Naartusoq, ilaqutariilluunniit ikiortariaappata qanilaartumik, suliatigullu piginnaasaqarluartumik ikiorserneqarsinnaassapput.

Tamanna tunuliaqutaralugu Inatsisartut, Naalakkersuisullu isummerfigisariaqagaat apeqqutit arlaliupput:

- Peqqinnissaqarfimmi isumaginninnermi suliatigut piginnaasat ullumikkut naammagisimaarnartumik atorpagut?
- Naartusunut, naalungiarsunnut, ilaqutariinnullu siusissumik tapersersuinnermi isumaginninnermi suliatigut piginnaasat qanoq atornerqarnerusinnaappat?
- Ernisussiortut, peqqissaasut, isumaginninnermilu sulisut akornanni suleqatigiinneq qanoq nukittorsarneqarsinnaava?
- Sulisut naleqquttumik ilinniaqqissimasut piginnaasaminnik peqqinnissaqarfimmi atuinissaminnut periarfissaqarnissaat qanoq qulakkeersinnaavarput?

Naartusunut, ilaqutariinnullu siusissumik suliniuteqarneq nukittunerussasoq kissaatigigutsigu piginnaasat pigeriikkatta atornissaannut pikkorinnerusariaqarpugut. Tamanna ilaqutariinnut iluaqutaassaaq, peqqinnissaqarfimmut nukittorsaataassaaq, meeqqamullu aallaqqaataaniilli ataqatigiinnerusumik ikiorsiinissamik pilersitsissalluni.

Oqallilluarnissaq, sammisamullu matumunnga pingaarutilimmut Naalakkersuisut, maanilu Inatsisartuni partiit sunik immersueqataanissaat tusassallugu qilanaaraara.